

Kulgam Encounter

दक्खनी कश्मीरे दे कुलगाम जिले दे गुडुर जंगली इलाके च सुरक्षाबलें ते आतंकवादियें बश्कार टाकरे च इक आतंकवादी गी मारी दिता गया ऐ। सेना दे इक प्रवक्ता नै जानकारी दिती जे इस टाकरे दौरान सेना दा इक जुनियर कमीशनड अधिकारी बी घायल होआ ऐ। एहदे शा पैहले आतंकवादियें दी मौजूदगी बारे इक टकोहदी सूह थहोने मगरा अज्ज बडुलै कुलगाम दे गुडुर आले जंगली इलाके च सेना, CRPF ते जम्मू-कश्मीर पुलसै इक सांझा तपाशी अभियान रम्भेया हा। सुरक्षाबलें दे उत्थे पुज्जदे गै आतंकवादियें गोलीबारी शुरु करी दिती जेहदा सेना नै पूरी तगड़ाई कन्नै परता दिता। इससै दौरान इक आतंकवादी गी मारी मकाया गया। अभियान अजे जारी ते होर ब्योरें गी बलगेयाजा रदा ऐ।

<><><><><><>

LG Soil Sensors

उपराज्यपाल मनोज सिन्हा होरें वैज्ञानिक समुदाय अग्गे आहवान कीता ऐ जे ओ हिमालयाई क्षेत्रें च लास-पस्सियां पौने दी शंकाएं बारे पैहले सौहगा करी देने बारे कोई साँयल सेन्सर यां नैनो-टैक्रालोजी जनेई बवस्था तयार करने दियें संभावनाएं दा पता लान, तां जे ऐसी क्रोपियें बारे पैहले पता लगगी जाने नै कीमती जानी या माली नुक्सान कोला बचेया जाई सकै। कल कश्मीर युनिवर्सिटी च आयोजित इक अंतराष्ट्रीय नैनो-टैक्रालोजी सम्मेलन दे उदघाटन सत्र गी सम्बोधित करदे होई एल.जी. होरें आक्खेया जे इस चाल्ली दे सेन्सर मिट्टी दी स्थिति दा पता लाने ते जिमी धस्सनें, लास पस्सियां पौने जनेई स्थिति पैदा होने कोला पैहले गै सौहगा सचेच करी सकन, तां एह मता फैयदेमंद साबत होई सकदा ऐ।

<><><><><><>

IMCT- Team

जम्मू-कश्मीर च हाडे ते बरखें कारण पैदा होए दे हालात दी जानकारी कठेरने लेई केन्द्र सरकार आसेया भेजी गेदी अंतर मंत्रालयी केन्द्री टीम नै कल बडगाम जिले दा दौरा कीता। राष्ट्रीय –आपदा प्रबंधन निगम दे कारवाइयें सरबंधि सलाहकार ते संयुक्त सचिव कर्नल के.पी. सिंह हुंदी अगुआई च आई दी इस टीम जेहदे च ग्रामीण विकास, NDMA, जलशक्ति, बिजली ते होरनें मंत्रालयें सवा आए दे अधिकारी बी शामिल न, नै कल उत्थु दे जिला विकास कमीशनर डाक्टर बिलाल मोहि-उद-दीन भट्ट हुंदे कन्नै इक जायजा बैठक लाई। बैठका च प्रभावत इलाकें दे बारे च चर्ची कीत गेई, जिन्दे च बेमिना ते बी.के. पोरा वगैरा शामिल न। इस दौरान उत्थे होए दे नुक्सान, जारी राहत ते बचाव कम्में ते प्रभावत इलाकें च बा-आबादकारी लेई भविक्ख दियें तयारियें दे बारे च चर्चा कीती गेई। केन्द्री टीम नै हाडे सवां प्रभावत इलाके च जाइयै लोकें कन्नै गल्लबात कीती ते उनेंगी दरपेश दिक्कतें-परेशानियें बारे बी पुच्छेया। टीमै लोकें गी भरोसा देआया जे इस बारे तफसीली रिपोर्ट तौले गै केन्द्र सरकार कश जमा करोआई दिती जाहग तां जे लोडचदी मदद लोकें तोडी पुज्जी सकै।

<><><><><><>

Train Service

उत्तरी रेलवे नै श्री माता वैष्णो देवी कटरा थमां संगलदान बश्कार 5 दिने लेई खास यात्रु रेल सेवा शुरु करने दा फैसला कीता ऐ। एह सेवा अज्जै थवां शुरु होई। इस सेवा गी रियासी ते रामबन च फसे दे यात्रियें दी सुविधा लेई चलाया गया ऐ, जेडे चानचक्क हाड औने करी फसी गेदे न। इक रेल गड्डी बडुलै 8 बज्जियै 40 मिनटें पर कटरा थवां चलोग ते एह बडुलै 10 बजे संगलदान पुज्जोग, जिसलै कि दपैहरी 2 बज्जियै 15 मिनटें पर एह रेल वापस परतोई औगा। एह गड्डी रियासी, बक्कल, Dugga ते Sawalakot थाहर किश चिर लेई रुकोगा। उयां जम्मू-कटरा आहली रेल सवा बाधित रहोग। रस्ते गी ठीक करियै सेवा गी ब्हाल करने लेई जत्त जारी न।

<><><><><><>

Highway

जम्मू-श्रीनगर राष्ट्रीय जरनैली सिडक गड्डियें दी आवा-जाई लेई अजे बी बंद ऐ, एह सिडक जखैनी ते Bali Nallah बश्कार सिडक बंद होने करी आवा-जाई लेई बंद ऐ। इस करी गड्डियें दी आमदोरफ्त पूरी चाली बंद ऐ, जेदे करी जरुरी चीजें-बस्ते ते आपातकालीन सेवाएं दी सप्लाई पर जिला उधमपुर, किशतवाड, डोडा, रामबन ते कश्मीर च असर पेया ऐ।

ट्रैफिक मैहकमे आसेया जारी हिदायतें मूजब जम्मू दे नगरोटो थवां चनैनी, पत्नीटाँप, डोडा, रामबन, बनिहाल, श्रीनगर जाने आहली गड्डियें गी अगुै जाने दी इजाजत नेंई होग। कटरा, रियासी ते उधमपुर आहले बसनीकें गी आक्खेया गया जे ओह फोटू लग्गे दे अपने ID कार्ड अपने कन्नै रक्खन तां जे उन्दी आवा-जाई होई सकै।



Pro. Announcement

सेवा सप्ताह 2025 दे तैहत आयोजित बक्ख-बक्ख कार्यक्रमें ते गतिविधियें दे इक हिस्से दे तौरा पर आकाशवाणी दा क्षेत्रीय समाचार एकांश जम्मू, अँदी 10 सितम्बर गी इक वशेष परिचर्चा प्रसारत करने जा रदा ऐ-जेहदा विषय सार ऐ-“निगगर आर्थिक सुधारें राएं विकास गी बढ़ावा।” इस कार्यक्रम च स्हाड़े महमान होगन- मन्ने-परमन्ने दे अर्थशास्त्री ते जम्मू युनिवर्सिटी च इकोनॉमिक्स दे जम्मू प्रोफैसर दिपांकर सेनगुप्त- जेहड़े इस विषय दे बक्ख-बक्ख पैहलुएं पर लौ पागन। उन्दे कन्नै गल्लबात करगन जगमोहन शर्मा ते कुणाल श्रीवत्स। 30एं मिन्टे दा एह कार्यक्रम अतरु बुधवारे दिने साड्डे 12 बजे प्रसारत कीता जाहग। जिसे तुस स्हाड़ी FM फ्रिक्वेंसी 100 इशारिया 3 मैगाहर्टस ते कन्नै मीडियम वेव 303 मीटर यानि 990 Khz पर बी सुनी सकदे ओ।



PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

